



王摩詰集卷之三

七言古詩

登樓賦

聊上君兮高樓以飛薨鱗次兮在下俯十二兮通
 衢綠槐參差兮車馬卻瞻兮龍首前眺兮宜春
 王畿鬱兮千里山河壯兮咸秦舍人下兮青宮
 據胡牀兮書空執戟疲於下位老夫好隱兮牆
 東亦幸有張伯英草聖兮龍騰虬躍擺長雲兮
 振翅風琥珀酒兮彫胡飯君不御兮日將晚秋
 風兮吹衣夕鳥兮爭返孤砧發兮東城林薄暮

長安郭
 長安郭
 諸子本

兮蟬聲遠時不可兮再得君何爲兮偃蹇

夷門歌

七雄雄雌猶未分攻城殺將何紛紛秦兵益圍
邯鄲急魏王不救平原君公子爲嬴停駟馬執
轡愈恭意愈下及爲屠肆鼓刀人羸乃夷門抱
關者非但慷慨獻奇謀意氣兼將身命酬向風
刎頸送公子七十老翁何所求

雙黃鵠歌送別

天路來兮雙黃鵠雲上飛兮水上宿撫翼和鳴
整羽族不得已忽分飛家在玉京朝紫微主人

臨水送將歸悲箱嘹唳垂舞衣賓欲散兮復相
依幾往返兮極浦尚徘徊兮落暉岸上火兮相
迎將夜入兮邊城鞍馬上佳人散悵離憂兮
獨含情

新秦郡松樹歌

青青山上松數里不見今更逢不見君心相憶
此心向君君應識爲君顏色高且閑亭亭迥出
浮雲間

青雀歌

青雀翅羽短未能遠食玉山禾猶勝黃雀爭上

下啣啣空倉復若何

盧象

啾啾青雀兒飛來飛去仰天池
逍遙飲啄安涯分何假扶搖九萬爲

王縉

林間青雀兒來往翩翩繞一枝
莫言不解銜環報但問君恩今若爲

崔興宗

青扈繞青林翩翩陋體一微禽
不應長在藩籬下他日凌雲誰見心

動息自適性不曾安與鷲雀羣
幸忝鴛鴦早相識何時提携致青雲

裴迪

贈徐中書望終南山歌

晚下兮紫微悵塵事兮多違
駐馬兮雙樹望青山兮不歸

送友人歸山歌二首

山寂寂兮無人又蒼蒼兮多木
群龍兮滿朝君何爲兮空谷
文寡和兮思深道難知兮行獨悅
石上兮流泉與松間兮草屋
入雲中兮養雞上

山頭兮抱犢神與棗兮如瓜虎賣杏兮收穀愧
不才兮妨賢嫌既老兮貪祿誓解印兮相從何
詹尹兮可卜

山中人兮欲歸雲冥冥兮雨霏霏水驚波兮翠
管靡白鷺忽兮翻飛君不可兮寒衣山萬重兮
一雲混天地兮不分樹掩曖兮氛氲依不見兮
空聞忽山西兮夕陽見東臯兮遠村平蕪綠兮
千里眇惆悵兮思君

魚山神女祠歌二首

迎神曲

坎坎擊鼓魚山之下吹洞簫望極浦女巫進紛
屢舞陳瑤席湛清醕風淒淒兮夜雨神之來兮
不來使我心兮苦復苦

送神曲

紛進拜兮堂前目眷眷兮瓊筵來不語兮意不
傳作暮雨兮愁空山悲急管思繁絃靈之駕兮
儼欲旋倏雲收兮雨歇山青青兮水潺湲

隴頭吟

長城少年游俠客夜上戍樓看太白隴頭明月
迥臨關隴上行人夜吹笛關西老將不勝愁駐

馬聽之雙淚流身經大小百餘戰麾下偏裨萬
戶侯蘇武才爲典屬國節旄空盡海西頭

老將行

少年十五二十時步行奪取胡馬騎射殺山中
白額虎背數韜下黃鬚兒一身轉戰三千里一
劍曾當百萬師漢兵奮迅如霹靂虜騎崩騰畏
蒺藜衛青不敗由天幸李廣無功緣數奇自從
棄置便衰朽世事蹉跎成白首昔時飛箭無全
目今日垂楊生左肘路傍時賣故侯瓜門前學
種先生柳茫茫古木連窮巷遼落寒山對虛牖

誓令踈勒出飛泉不似潁川空使酒賀蘭山下
陣如雲羽檄交馳日夕聞節使三河募年少詔
書五道出將軍試拂鐵衣如雪色聊持寶劍動
星文願得燕弓射天將恥令越甲鳴吳軍莫嫌
舊日雲中守猶堪一戰立功勳

燕支行

漢家天將才且雄來時謁帝明光宮萬乘親推
雙闕下千官出餞五陵東誓辭甲第金門裏身
作長城玉塞中衛霍才堪一騎將朝廷不數貳
師功趙魏燕韓多勁卒關西俠少何咆勃報讐

只是聞嘗膽飲酒不曾妨刮骨畫戟雕戈白日
寒連旗大旆黃塵沒疊鼓遙翻瀚海波鳴笳亂
動天山月麒麟錦帶佩吳鉤颯踏青驪躍紫駟
拔劍已斷天驕臂歸鞍共飲月支頭漢兵大呼
一當百虜騎相看哭且愁教戰雖令赴湯火終
知上將先伐謀

桃源行

漁舟逐水愛山春兩岸桃花夾去津坐看紅樹
不知遠行盡青溪不見人山口潛行始隈隩山
開曠望旋平陸遙看一處攢雲樹近入千家散

花竹樵客初傳漢姓名居人未改秦衣服居人
共住武陵源還從物外起田園月明松下房櫳
靜日出雲中雞犬喧驚聞俗客爭來集競引還
家問都邑平明問巷掃花開薄暮漁樵乘水入
初因避地去人間更問成仙遂不還峽裏誰知
有人事世中遙望空雲山不疑靈境難聞見塵
心未盡思鄉縣出洞無論隔山水辭家終擬長
游衍自謂經過舊不迷安知峯壑今來變當時
只記入山深青溪幾度到雲林春來遍是桃花
水不辨仙源何處尋

洛陽女兒行

洛陽女兒對門居，纔可顏容十五餘。良人玉勒乘驄馬，侍女金盤膾鯉魚。畫閣朱樓盡相望，紅桃綠柳垂簷向。羅帷送上七香車，寶扇迎歸九華帳。狂夫富貴在青春，意氣驕奢劇季倫。自憐碧玉親教舞，不惜珊瑚持與人。春牕曙滅九微火，九微片片飛花璫。戲罷曾無理曲時，粧成祗是薰香坐。城中相識盡繁華，日夜經過趙李家。誰憐越女顏如玉，貧賤江頭自浣沙。

白鼈渦

南山之瀑水兮，激石湍瀑似雷驚。人相對兮不聞語聲，翻渦跳沫兮蒼苔濕。蘚老且厚，春草爲之不生。獸不敢驚動，鳥不敢飛鳴。白鼈渦濤戲漱兮，委身以縱橫。主人之仁兮，不網不釣。得遂性以生成。

黃雀癡

黃雀癡，黃雀癡，謂言青鵲是我兒。一一口銜食，養得成。毛衣到大啁啾，解游颺。各自東西南北飛，薄暮空巢上。羈雌獨自歸，鳳凰九雛亦如此。慎莫愁思顛，顛損容輝。

贈裴迪

不相見不相見來久日日泉水頭常憶同攜手
攜手本同心復嘆忽分襟相憶今如此相思深
不深

榆林群歌

山頭松柏林山下泉聲傷客心千里萬里春草
色黃河東流流不息黃龍戍上游俠兒愁逢漢
使不相識

問寇校書雙溪

君家少室西爲復少室東別來幾日今春風

新買雙溪定何似餘生欲寄白雲中

寄崇梵僧

崇梵僧崇梵僧秋歸覆釜春不還落花啼鳥紛
紛亂澗戶山牕寂寂閑峽裏誰知有人事郡中
遙望空雲山

奉和聖製天長節賜宰臣歌應制

太陽升兮照萬方開閭闔兮臨玉堂儼冕旒兮
垂衣裳金天淨兮麗三光彤庭曙兮延八荒德
合天兮禮神遍靈芝生兮慶雲見唐堯后兮稷
高臣匝宇宙兮華胥人盡九服兮皆四鄰乾降

瑞兮坤獻珍

同崔傅答賢弟

洛陽才子姑蘇客，桂苑殊非故鄉陌。
九江楓樹幾回青，一片揚州五湖白。
揚州時有下江兵，蘭陵鎮前吹笛聲。
夜火人歸富春郭，秋風鶴唳石頭城。
周郎陸弟爲儔侶，對舞前溪歌白紵。
曲机書留小史家，草堂碁賭山陰墅。
衣冠若話外臺臣，先數夫君席上珍。
更聞臺閣求三語，遙想風流第一人。

同北部揚貞外十五夜遊有懷靜者季

承明少休沐，建禮省文書。
夜漏行人息，歸鞍落日餘。
懸知三五夕，萬戶千門闌。
夜出驕龍歸，傾城滿南陌。
陌頭馳騁盡繁華，王孫公子五侯家。
由來月明如白日，共道春燈燦百花。
聊看侍中千寶騎，強識小婦七香車。
香車寶馬共喧闐，箇裏多情俠少年。
競向長楊柳市北，肯過精舍竹林前。
獨有仙郎心寂寞，却將宴坐爲行樂。
儂覺忘懷共往來，幸霑同舍甘藜藿。

故人張運工詩善易卜兼能丹青
頃以詩見贈聊獲酬之

不逐城東遊俠兒，隱囊紗帽坐彈碁。蜀中夫子
時開卦，洛下書生解詠詩。藥欄花逕衙門裏，時
復焚香神聽之。屏風誤點惑孫郎，團扇草書輕
內史。教園高林度三春，永日垂帷絕四鄰。自想
蔡邕今已老，更將書籍與何人。

贈吳官

長安客舍熱如煮，無箇茗糜難御暑。空搖白團
其諦苦，欲向縹囊還歸旅。江鄉鯖鮓不寄來，秦
人湯餅那堪許。不如儂家任挑達，草屨蠓蝦富
春者。

雪中憶李楫

積雪滿阡陌，故人不可期。長安千門復萬戶，何
處躑躅黃金羈。

送崔五大守

長安廐吏來到門，未央露網動行軒。黃花縣西
九折坂，玉樹宮南五大原。褒斜谷中不容憶，唯
有白雲當露冕。子午山裏杜鵑啼，嘉陵水頭行
客飯。劔門忽斷蜀川開，萬井雙流滿眼來。霧中
遠樹乃州出，天際澄江巴字迴。使君年幾三十
餘，少年白晢專城居。欲持畫省郎官筆，更與臨

叩父老書

送李睢陽

將置酒思悲翁使君去出城東麥漸漸雉子斑
槐陰陰到潼關騎連連車遲遲心中悲宋又遠
周間之南淮夷東齊兒碎碎織練與素絲遊人
賈客信難持五穀前熟方可爲下車閉閣君當
思天子當殿儼衣裳太官尚食陳羽觴彤庭散
綬垂鳴璫黃紙詔書出東廂輕疉綺爛生光
宗室子弟君最賢分憂當爲百辟先布衣一言
相爲死何況聖主恩如天鸞聲噦噦魯侯旗明

年上計朝京師須憶今日斗酒別慎勿富貴忘
我爲

寒食城東即事

清溪一道穿桃李演漾綠蒲涵白芷溪上人家
凡幾家落花半落東流水蹴踘屢過飛鳥上鞦韆
競出垂楊裏少年分日作遨遊不用清明兼
上巳

不遇詠

北闕獻書寢不報南山種田時不登百人會中
身不預五侯門前心不能身投河朔飲君酒家

在茂陵平安否且此登山復臨水莫問春風動
楊柳今人昨人多自私我心不說君應知濟人
然後拂衣去肯作徒爾一男兒

荅張五弟

終南有茅屋前對終南山終年無客長閉關終
日無心長自閑不妨飲酒復垂釣君但能來相
往還

王摩詰集卷第三

王摩詰集卷第四

五言律詩

奉和聖製賜史供奉曲江宴應制

侍從有鄒枚瓊筵就水開言陪栢梁宴新下建
章來對酒山河滿移舟草樹迴天宮同麗日駐
景惜行杯

從岐王過楊氏別業應教

楊子談經所淮王載酒過興闌啼鳥換坐久落
花多逕轉迴銀燭林開散玉珂嚴城時未啓前
路擁笙歌

從岐王夜讌衛家山池應教

座客香貂滿宮娃綺幔張澗花輕粉色山月少
燈光積翠紗窓暗飛泉繡戶涼還將歌舞出歸
路莫愁長

和尹諫議史館山池

雲館接天居霓裳侍玉除春池百子外芳樹萬
年餘洞有僊人錄山藏太史書君恩深漢帝且
莫上空虛

同崔員外秋宵寓直

建禮高秋夜承明候曉過九門寒漏徹萬井曙

鍾多月迥城珠斗雲消出絳河更無衰朽質南
陌共鳴珂

奉和楊駙馬六郎秋夜即事

高樓似霜秋夜鬱金堂對坐彈盧女同看舞
鳳凰少兒多送酒小玉更焚香結束平陽騎明
朝入建章

訓嚴少尹徐舍人見過不遇

公門暇日少窮巷故人稀偶值乘蓋舉非開避
白衣不知炊黍否誰解掃荆扉君但傾茶碗無
妨騎馬歸

慕容承携素饌見過

紗帽烏皮兒閑居懶賦詩門看五柳識年筭六
身知靈壽君王賜彫胡弟子炊空勞酒食饌特
底解人頤

訓慕容上

行行西陌返駐爐問車公挾轂雙官騎應門五
尺僮老年如塞北強起離牆東為報壺丘子來
人道姓蒙

訓張少府

晚年唯好靜萬事不關心自顧無長策空知返

舊林松風吹解帶山月照彈琴君問窮通理漁
歌入浦深

喜祖三至留宿

門前洛陽客下馬拂征衣不在故人駕平生多
掩扉行人返深巷積雪帶餘暉早歲同袍者高
車何處歸

答

祖詠

四年不相見相見復何為握手言未畢却令傷
別離升堂還駐馬酌醴便呼兒語嘿自相對安
用傍人知

酬虞部蘇貞外過藍田別業不見畱之作

貧居依谷口，喬木帶荒村。石路在廻駕，山家誰
候門。漁舟膠東浦，獵火燒寒原。唯有白雲外，踈
鍾聞夜猿。

訓此部楊貞外暮宿琴臺朝躋書閣率
爾見贈之作

舊簡拂塵看鳴琴，候月彈桃源。迷漢姓，松樹有
秦官。空谷歸人少，青山昔日寒。羨君棲隱處，遙
望白雲端。

訓賀四贈葛巾之作

野巾傳惠好，茲貺重兼金。嘉此幽棲物，能齊隱
吏心。早朝方暫挂，晚沐復來簪。坐覺囂塵遠，思
君共入林。

輞川閑居贈裴秀才迪

寒山轉蒼翠，秋水日潺湲。倚仗柴門外，臨風聽
暮蟬。渡頭餘落日，墟里上孤烟。復值接輿醉，狂
歌五柳前。

寄荊州張丞相

所思竟何在，悵望深荆門。舉世無相識，終身思

舊恩方將與農圃藝植老丘園目盡南無鴈何
由寄一言

冬晚對雪憶胡居士家

寒更傳曉箭清鏡覽衰顏隔牖風驚竹開門雪
滿山灑空深巷靜積素廣庭閑借問袁安舍脩
然尚閉關

山居秋暝

空山新雨後天氣晚來秋明月松間照清泉石
上流竹喧歸浣女蓮動下漁舟隨意春芳歇王
孫自可留

終南別業

中歲頗好道晚家南山陲興來每獨往勝事空
自知行到水窮處坐看雲起時偶然值林叟談
笑無還期

山居即事

寂寞掩柴扉蒼茫對落暉鶴巢松樹遍人訪蕪
門稀綠竹含新粉紅蓮落故衣渡頭煙火起處
處採菱歸

韋給事山居

幽尋得此地詎有一人曾大壑隨堦轉羣山入

戶登庖厨出深竹印綬隔垂藤即事辭軒冕誰
云病未能

歸嵩山作

清川帶長薄車馬去閑閑流水如有意暮禽相
與還荒城臨古渡落日滿秋山迢遞嵩高下歸
來且閉關

歸鞞川作

谷口踈鍾動漁樵稍欲稀悠然遠山暮獨向白
雲歸菱蔓弱難定楊花輕易飛東臯春草色惆
悵掩柴扉

終南山

太一近天都連山到海隅白雲迴望合青靄入
看無分野中峰變陰晴衆壑殊欲投人處宿隔
水問樵夫

鞞川閑居

一從歸白社不復到青門時倚簷前樹遠看原
上村青菰臨水映白鳥向山翻寂寞於陵子桔
槔方灌園

春園即事

宿雨乘輕屐春寒看弊袍開畦分白水間柳發

紅桃草際成碁局林端舉桔槔還持鹿皮机日
暮隱蓬蒿

淇上即事田園

屏居淇水上東野曠無山日隱桑柘外河明閭
井間牧童望村去獵犬隨人還靜者亦何事荆
扉乘晝開

與盧象集朱家

主人能愛客終日有逢迎貫得新豐酒復聞秦
女箏柳條踈客舍槐葉下秋城語笑且爲樂吾
將達此生

過福禪師蘭若

巖壑轉微逕雲林隱法堂羽人飛奏樂天女跪
焚香竹外峯偏曙藤陰水更涼欲知禪坐久行
路長春芳

黎拾遺昕裴迪見過秋夜對雨之作

促織鳴已急輕衣行向重寒燈坐高館秋雨聞
踈鐘白法調狂象玄言問老龍何人顧蓬逕空
愧牛羊蹤

晚春嚴少尹與諸公見過

松菊荒三逕圖畫共五車烹葵邀上客看竹到

貧家鵲乳先春草
鶯啼過落花
自憐黃髮暮
一倍惜年華

過感化寺曇興上人山院

暮持筇竹杖
相待虎溪頭
催客聞山響
歸房逐水流
野花叢發好
谷鳥一聲幽
夜坐空村寂
松風直似秋

同詠

裴迪

不遠灞陵邊
安居向十年
入門穿竹逕
留客聽山泉
鳥嘯深林裏
心閑落照前
浮名竟何益
從此願棲禪

夏日過青龍寺謁操禪師

龍鍾一老翁
徐步謁禪宮
欲問義心義
遙知空病空
山河天眼裏
世界法身中
莫恠銷炎熱
能生大地風

同詠

裴迪

安禪一室內
左右竹亭幽
有法知不染
無言誰敢酬
鳥飛爭向夕
蟬噪已先秋
煩暑自茲適
清涼何所求

鄭果州相過

麗日照殘春
初晴草木新
牀前磨鏡客
樹下灌

嶺山斷青塞斷江向白雲平獻賦何時至明
君當長

送張判官赴河西

軍車曾出塞報國敢邀勳見逐張征虜今思霍
將軍沙平連白雪蓬卷入黃雲慷慨倚長劍高
歌一送君

送岐州源長史歸

同在崔常侍幕中時常侍已歿

握手一相送心悲安可論秋風正蕭索客散
營門故驛通魏里長亭下僅原征西舊旌節
此向河源

送張道士歸山

先生何處去王屋訪茅君別婦留丹訣驅雞入
白雲人間苦難住天上復離羣當作遼城鶴仙
歌使爾聞

同崔興宗送瑗公

言從石菌閣新下穆陵關獨向池陽去白雲留
故山綻衣秋日裏洗鉢古松間一施傳心法唯
將戒定還

同詠

崔興宗

行苦神亦秀冷然溪上松銅瓶與竹杖來自祝

融峰常願入靈嶽藏經訪遺蹤南歸見長老且
爲說心曾

送錢少府還藍田

草色日向好桃源人去稀手持平子賦日送老
萊衣每候山櫻發時同海燕歸今年寒食酒應
得返柴扉

留別錢起

卑棲却得性每與白雲歸徇祿仍懷橘看山免
採薇暮禽先去馬新月待開扉霄漢時回首知
音青瑣闥

送丘爲往唐州

宛洛有風塵君行多苦辛四愁連漢水百口寄
隨人槐色陰清晝楊花惹暮春朝端肯相送天
子繡衣臣

留別丘爲

歸鞍白雲外綠繞出前山今日又明日自知心
不閑親勞簪組送欲趁鶯花還一步一趨首還
遲向近關

送元中丞轉運江淮

薄稅歸天府輕徭賴使臣歡沾賜帛老恩及老

綃人去問珠官俗來經石砌春東南高亭上莫
使有風塵

送崔九與宗遊蜀

送君從此去轉覺故人稀徒御猶迴首田園方
掩扉出門當旅食中路授寒衣江漢風流地遊
人何處歸

送崔興宗

已恨親皆遠誰憐友復稀君王未西顧遊宦盡
東歸塞迥山河濶天長雲樹微方同菊花節相
待洛陽扉

送平淡然判官

不識陽關路新從定遠侯黃雲斷春色畫角起
邊愁瀚海經年到交河出塞流須令外國使知
飲月支頭

送孫秀才

帝城風日好況復建平家玉枕雙文簾金盤五
色瓜山中無魯酒松下飯胡麻莫厭田家苦歸
期遠復賒

送劉司直赴安西

絕域陽關道胡沙與塞塵三春時有鴈萬里少

行人首著隨天馬蒲萄逐漢臣當今外國懼不
敢覓和親

送趙都督赴代州

天官動將星漢上柳條青萬里鳴刁斗三軍出
井陘忘身辭鳳闕報國取龍庭豈學書生輩恣
間老一經

送方城韋明府

遙思葭茨際寥落楚人行高鳥長淮水平蕪故
郢城使車聽雉乳縣鼓應雞鳴若見州從事無
嫌手扳迎

送李員外賢郎

少年何處去負米上銅梁借問阿戎父知爲童
子郎魚牋請詩賦撞布作衣裳薏苡扶衰病歸
來幸可將

送梓州李使君

萬壑樹參天千山響杜鵑山中一夜雨樹抄百
重泉漢女輸撞布巴人訟芋田文翁翻教授不
敢倚先賢

送張五諲歸宣城

五湖千萬里況復五湖西漁浦南陵郭人家春

穀溪欲歸江水淼淼未到草萋萋憶想蘭陵鎮可
宜猿更啼

送友人南歸

萬里春應盡三江鴈亦稀連天漢水廣孤客郢
城歸鄖國稻苗秀楚人菰米肥懸知倚門望遙
識老萊衣

送賀遂員外外甥

南國有歸舟荆門泝上流蒼茫葭葦外雲水與
昭丘檣帶城烏去江連暮雨愁猿聲不可聽莫
待楚山秋

送楊長史赴果州

褒斜不容憶之子去何之鳥道一千里猿啼十
二時官橋祭酒客山木女郎祠別後同明月君
應聽子規

送邢桂州

鏡吹喧京口風波下洞庭潛圻將赤岸擊汰復
揚舲日落江湖白潮來天地青明珠歸合浦應
逐使臣星

送宇文三赴河西充行軍司馬

橫吹雜繁笳邊風卷塞沙還聞田司馬更逐李

輕車蒲壘成秦地
莎居屬漢家
當令犬戎國朝
聘學昆耶

送孫二

郊外誰相送
夫君道術親
書生鄒魯客
才子洛陽人
祖席依寒草
行車起暮塵
山川何寂寞
長望淚沾巾

送崔三往密州觀省

南陌去悠悠
東郊不少留
同懷扇枕戀
獨念倚門愁
路遶天山雪
家臨海樹秋
魯連功未報
且莫蹈滄洲

送丘爲落第歸江東

憐君不得意
况復柳條春
爲客黃金盡
還家白髮新
五湖三畷宅
萬里一歸人
知爾不能薦
羞爲獻納臣

春日上方即事

好讀高僧傳
時看辟穀方
鳩形將刻杖
龜殼用支牀
柳色春山映
梨花夕鳥藏
北窓桃李下
閑坐但焚香

漢江臨汎

楚塞三湘接
荆門九派通
江流天地外
山色有

無中郡邑浮前浦波瀾動遠空襄陽好風日留
醉與山秋

登辨覺寺

竹逕從初地蓮峰出化城窓中三楚盡林上九
江平輭草承趺坐長松響梵聲空居法雲外觀
世得無生

涼州郊外遊望

野老才三戶邊村少四鄰婆娑依里社簫鼓賽
田神灑酒澆芻狗焚香拜木人女巫紛屢舞羅
襪自生塵

觀獵

風勁角弓鳴將軍獵渭城草枯鷹眼疾雪盡馬
蹄輕忽過新豐市還歸細柳營迴看射鵰處千
里暮雲平

汎前陂

秋空自明迥况復遠人間暢以沙際鶴兼之雲
外山澄波淡將夕清月皓方閑此夜任孤棹夷
猶殊未還

游李山人所居因題屋壁

世上皆如夢狂來或自歌問年松樹老有地竹

林多藥倩韓康賣門客尚子過翻嫌枕席上無
那白雲何

登河北城樓作

井邑傳巖上客亭雲霧間高城眺落日極浦映
蒼山岸火孤舟宿漁家夕鳥還寂寥天地暮心
與廣川閑

登裴迪秀才小臺作

端居不出戶滿目望雲山落日鳥邊下秋原人
外閑遙知遠林際不見此簷間好客多乘月應
門莫上關

被出濟州

微官易得罪謫去濟川陰執政方持法明君無
此心問閭河潤上井邑海雲深縱有歸來日各
愁年鬢侵

干塔主人

逆旅逢佳節征帆未可前窓臨汴河水門渡楚
人船雞犬散墟落桑榆蔭遠田所居人不見枕
席生雲烟

晚春閨思

新粧可憐色落日卷羅帷鑪氣清珍簾墻陰上

玉墀春蟲飛網戶暮雀隱花枝向晚多愁思
閑窓桃李時

使至塞上

單車欲問邊屬國過居延征蓬出漢塞歸鴈入
胡天大漠孤烟直長河落日圓蕭關逢候吏都
護在燕然

戲題示蕭氏外甥

憐爾解臨池渠爺未學詩老夫何足似弊宅倘
因之蘆筍穿荷葉菱花罨鴈兒邨公不易勝莫
着外家欺

秋夜獨坐

獨坐悲雙鬢空堂欲二更雨中山果落燈下草
虫鳴白髮終難變黃金不可成欲知除老病唯
有學無生

待儲光羲不至

重門朝已啓起坐聽車聲要欲聞清珮方將出
戶迎晚鍾鳴上苑踈雨過春城了自不相顧臨
堂復空情

聽官鶯

春樹遶官牆春鶯轉曙光忽驚啼暫斷移處弄

還長隱葉棲承露攀花出未央遊人未應返爲
此思故鄉

早朝

柳暗百花明春深五鳳城
城烏睥睨曉宮井
轆轤聲方朔金門侍班姬
玉輦迎仍聞遣方士東
海訪蓬瀛

愚公谷三首

愚谷與誰去唯將黎子同
非須一處住不那兩
心空寧問春將夏誰論
西復東不知吾與子若
箇是愚公

吾家愚谷裏此谷本來平
雖則行無跡還能響
應聲不隨雲色暗只待
日光明緣底名愚谷都
由愚所

借問愚公谷與君聊一尋
不尋翻到谷此谷不
離心行處曾無險看時
豈有深寄言塵世客何
處欲歸臨

雙燕初命子五桃初作花
王昌是東舍宋玉文
西家小小能織綺時時
出浣沙親勞使君問
陌駐香車

過秦皇墓

古墓成蒼嶺幽宮象紫臺星辰七曜隔河漢九
泉開有海人寧渡無春鴈不迴更聞松韻切疑
是大夫哀

故太子太師徐公挽歌四首

功德冠羣英彌綸有大名軒皇用風后傳說是
星精就第優遺老來朝詔不名留侯常辟穀何
苦不長生

謀猷爲相國翊贊奉乘輿劔履升前殿貂蟬託
後車齊侯疏上宇漢室賴圖書僻處留田宅仍

纔十頃餘

舊里趨庭日新年置酒辰聞詩鸞渚客獻賦鳳
樓人北闕辭明主東堂哭大臣猶思御朱輅不
惜汗車茵

久踐中台座終登上將壇誰言斷車騎空憶盛
衣冠風日咸陽慘笳簫渭水寒無人當便闕應
罷太師官

故西河郡杜太守挽歌三首

天上去西征雲中護北平生擒白馬將連破黑
鵬城忽見芻靈苦徒聞竹使榮空留左氏傳誰

繼卜商名

返葬金符守同歸石窀棲卷衣悲畫翟持翼待
鳴雞容衛都人慘山川駟馬嘶猶聞隴上客相
對哭征西

塗芻去國門祕器出東園太守畱金印夫人罷
錦軒旌旄轉衰木簫鼓上寒原墳樹應西靡長
思魏闕恩

故南陽夫人樊氏挽歌

錦衣餘翟第繡轂罷魚軒淑女詩長在天人法
尚存凝笳隨曉旆行哭向秋原歸去將何見誰

能返戟門

送奚侍郎夫人寇氏二首

束帶將朝日鳴環映牖展能令明諫主相勸識
賢人遺挂空畱壁迴文日覆塵金蠶將畫柳何
處更知春

女史悲彤管夫人罷錦軒卜筮占二室行哭度
千門秋日光能淡寒川波自翻一朝成萬古松
栢暗平原

恭懿太子挽歌五首

何悟藏環早纔知拜壁年神天王子去對日聖

君憐樹轉宮猶出笳悲馬不前
驛蒙絕馳道京兆別開阡

蘭殿新恩切椒宮夕臨幽白雲
隨風管明月在龍樓人向青山
哭天臨滑水愁雞鳴常問膳今
恨玉京留

騎吹凌霜發旌旗夾路陳愷容
金節護冊命玉符新傳母悲香
祿君家擁畫輪射熊今夢帝稱
象問何人

蒼舒留帝寵子晉有僊才五歲
過人智三天使鶴催心悲四祿
館目斷望思臺若道長安近何

爲更不來

西望昆池闊東瞻下杜平山朝
豫章館樹轉鳳凰城五校連旗
色千門疊鼓聲金環如有驗還
向畫堂生

王摩詰集卷第四

